



**Sud Bosne i Hercegovine
Суд Босне и Херцеговине**

**Broj: S1 3 Iž 038178 20 Iž
Sarajevo, 26.10.2020. godine**

IZVORNİK

Sud Bosne i Hercegovine, u vijeću Apelacionog odijeljenja sastavljenom od sudija Vesne Trifunović kao predsjednika vijeća, Dinke Bešlagić Čovrk i Srete Crnjaka kao članova vijeća, odlučujući o žalbi Dragomira Bašića, Radivoja Dimitrijevića 5, 15356 Badovinci - Glušci, R Srbija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 26.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što je isti registrovan na više različitih adresa.

Žalitelj je protiv navedene odluke blagovremeno izjavio žalbu u kojoj navodi da je provjerom utvrdio da je prijavljen na više adresa, te u prilogu dostavlja potvrdu da je trenutno raspoređen na rad u Badovincima-Glušcima.

Centralna izborna komisija Bosne i Hercegovine u odgovoru na žalbu navodi da su za podnositelja žalbe dostavljene tri prijave u kojima su navedene različite adrese na koje će biti upućen glasački materijal, te da žalitelj nije dostavio potvrdu

nadležnog organa o prebivalištu/boravištu izvan BiH, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz stanja spisa proizlazi da je Centralna izborna komisija BiH prije donošenja pobijane odluke, utvrdila da su za navedeno lice dostavljene tri (3) prijave na obrascu PRP-1-Prijava za glasanje izvan BiH, te su navedene različite adrese na koje će biti upućen glasački materijal. U konkretnom slučaju u prvoj prijavi je navedena adresa Radivoja Dimitrijevića 5, 15356 Badovinci - Glušci, R Srbija, u drugoj prijavi je navedena adresa Jurija Gagarina 164 A/46, 11000/11070 Beograd/Novi Beograd, R Srbija, dok je u trećoj prijavi navedena adresa Aleksandra Tišme, 21000 Novi Sad, R Srbija.

I po shvatanju apelacionog vijeća, druge dostavljene prijave žalitelja Dragomira Bašića se ne mogu smatrati obaviješću o promjeni podataka u smislu člana 3.16 stav 1. Izbornog zakona BiH, s obzirom da podnositelj žalbe podnošenjem drugih prijava nije ukazao da ima saznanja o podnesenoj prvoj prijavi, kada bi se moglo cijeniti da druge podnesene prijave predstavljaju promjenu podataka o boravištu u inostranstvu.

Tačna adresa stanovanja državljanina BiH koji privremeno živi u inostranstvu, ima biračko pravo i upisan je u Centralni birački spisak, predstavlja obavezni element prijave propisan članom 3.15 stav 1 Izbornog zakona (Sl. glasnik BiH br.23/01 sa izmjenama). Državljanin BiH je shodno članu 3.16. stav 1 citiranog zakona obavezan Centralnu izbornu komisiju BiH obavijestiti o promjeni podataka koje je predhodno dostavio, i to do isteka roka utvrđeno za podnošenje prijave za glasanje van BiH.

Kako podnositelj žalbe nije Centralnoj izornoj komisiji BiH dostavio, u smislu člana 3.15 stav 1. i 7. Izbornog zakona BiH, potvrdu nadležnog organa o prebivalištu/boravištu izvan BiH kako bi se sa sigurnošću moglo zaključiti da je adresa na kojoj zahtjeva da bude registrovan prava adresa njegovog prebivališta/boravišta u inostranstvu, to i prema shvatanju apelacionog vijeća Centralna izborna komisija BiH nije bila u mogućnosti da utvrdi koja je od podnesenih prijava vjerodostojna. Tu činjenicu je dužan dokazati podnositelj prijave u smislu navedene odredbe Izbornog zakona BiH. S tim u vezi, pravilna je i zakonita odluka Centralne izborne komisije BiH, da navedenom licu odbije upis u izvod iz Centralnog biračkog spiska za glasanje izvan BiH.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Vesna Trifunović